



Title	洛東遊記
Author(s)	三輪, 時雄
Citation	懷徳. 1929, 7, p. 88-89
Version Type	VoR
URL	https://hdl.handle.net/11094/88796
rights	
Note	

The University of Osaka Institutional Knowledge Archive : OUKA

<https://ir.library.osaka-u.ac.jp/>

The University of Osaka

洛東遊記

確堂 三輪 時雄

八八

昭和二年六月十二日。懷德堂々友會同人。遊洛東泉涌寺。至天滿橋畔乘電車。出北郊。眼界頓開。村々新綠如花。田々積水似鏡。而隴麥黃熟。梅天方晴。男女在野。麥不可不穫。秧不可不分。農家忙可知。

女穫男耕映麥黃。田疇水漲待分秧。散人不管農忙節。吟杖欲探塵外鄉。

下車。先過東福寺。憩通天橋畔。老楓滿溪。新葉展綠。仰蒼穹。俯碧澗。眞爲萬綠叢中想。偶見座間有婦人在。戲賦一詩。

瑠璃天色映青楓。楓葉美於翡翠叢。俯仰茫茫一碧裡。如花三四來點紅。

昔山陽外史遊通天橋。有詩云。上方山暝宿禽喧。澗底紅楓照酒樽。非有鐘聲相報道。何緣知得是黃昏。竊怪通天橋在東福寺門內。寺屬臨濟宗。持律太嚴。外史何由携葦酒來。乃戲次韻詰之。未知外史爲苦笑否。

新綠幽谿隔世喧。禪關我憾禁携樽。山陽外史知何法。一醉醺々坐至昏。

鈴木豹軒曰。令山陽外史誦之。必不禁苦笑。

過橋上去。北行至泉涌寺。寺境域宏濶。萬樹鬱蒼。帚掃具到。不住一塵。入堂先開所携行廚。新蟬呼夏。暑蒸頓至。寺僧導余等。詣靈明殿海會堂。一一說明。靈明殿奉安歷朝天皇后妃木主之所。爲最神聖之壇矣。出寺門。歷拜孝明天皇陵英照皇太后陵後堀河天皇陵。終及月輪陵。陵域較小。然帝陵十四。御灰塚四。中宮陵九。皆在其中。余跪拜陵前。追思往時皇威之陵夷。感慨久之。

眼看當年皇運窮。帝陵十四一坳中。訝他中駿能山上。祠廟巍々壓海東。

豹軒曰。遊記諸作以此首爲壓卷。松本奎堂久能山作云。金椎難入九泉底。此是祖龍埋骨山。此篇蓋異曲而同工者矣。

時日尙高。乃步詣養源院。院以伏見城舊材建之云。所謂血天井者。元爲城中回廊。德川氏臣三百八十四士。自刃於此。廊上碧血殷々。于今使人悚然。

三百八十四士魂。凝爲碧血報主恩。古寺藻井血猶存。義烈千秋照乾坤。嗚呼德川長流豈無源。濟々忠臣護家門。豹軒曰。言短味永。

忽見天色如墨。驟雨傾盆而來。移時不息。去憩三十三間堂前旗亭。亭在蓮池中。綠柳圍繞。藕香往來。足以怡心。日傾雨止。出向圓山公園。園中雨後不留纖塵。東山當面。新綠鮮妍。景致殊佳。乃入平野亭。張小筵。膳羞雖簡。亦頗適口。快談如泉。謂曩在養源院。若無驟雨來。我儕業已就歸途。然則池亭祇園之觀勝與平野亭小筵。皆可謂驟雨之賜也。

雨洗新林綠更鮮。旗亭笑坐落暉筵。錦囊今日多珠玉。荷得梅天驟雨緣。醺餘出亭。乘電車。九時歸阪。

磯野秋渚曰。叙事詳明。處々插秀句。爲添一段之精彩。

拜陸軍中將辭令書感

三

輪

時

雄

昨迎咫尺萬乘尊。今上將壇過二門。偏憶小臣浴殊寵。不知何以答君恩。起句指六月五日。聖上陛下臨幸。同憲逸駿半凋殘。何幸駑駘却進壇。畢竟榮枯是天運。吾唯盡命致忠肝。